

Reglur fyrir Háskóla Íslands nr. 569/2009, X.kafla um Lagadeild

LAGADEILD

90. gr. Kennslugreinar, prófgráður og námseiningar

Lagadeild veitir kennslu til [BA-gráðu]³ og [meistaragráðu]³ í lögfræði. [Meistaragráða]³ í lögfræði er jafngildi kandídatprófs. Sá sem hefur lokið [meistaragráðu]³ við Lagadeild ber próftítilinn magister juris (mag. jur.). Enn fremur veitir deildin kennslu til [meistaragráðu]³ í umhverfis- og auðlindafræði og öðrum þverfræðilegum greinum í samvinnu við aðrar háskóladeildir, þar sem nauðsynleg aðstaða er fyrir hendi.

Auk kennslu stendur deildin fyrir rannsóknum á fræðasviðum deildarinnar.

Kennsla fer fram í námsgreinum sem metnar eru til námseininga. Nám í lögfræði til [BA-gráðu]³ jafngildir 180 einingum. Nám í lögfræði til [meistaragráðu]³ jafngildir 300 einingum, þ.e. 120 einingum í framhaldsnámi að [lokinni BA-gráðu].³

[...]¹

Framhaldsnám í lögfræði til [meistaragráðu]³ er 120 einingar. Það er fólgið í námsgreinum sem vega samtals 90 einingar og ritgerð sem vegur 30 einingar. Stúdent útskrifast með [meistaragráðu]³ í lögfræði, magister juris (mag. jur.). [...]¹

Í Lagadeild er heimilt að bjóða upp á sérstakt nám til [meistaragráðu]³ og [doktorsgráðu]³ í lögfræði, á íslensku eða á ensku, samkvæmt nánari reglum sem Lagadeild setur og háskólaráð staðfestir, sbr. 66. – 69. gr. reglna þessara. Sá sem hefur lokið meistaránámi í auðlindarétti og alþjóðlegum umhverfissrétti við Lagadeild, eftir [BA-gráðu]³ í lögfræði eða sambærilegt nám, ber próftítilinn LL.M. (Master of Laws) in Natural Resources Law and International Environmental Law.

[Deildinni er heimilt að skipuleggja og bjóða fram örnám, sbr. 55. gr. í reglum þessum.]²

Lagadeild setur nánari reglur um nám við Lagadeild, þ. á m. um BA-nám og framhaldsnám í lögfræði.

Lagadeild setur reglur um viðurkenningu fyrra náms við endurskráningu stúdenta og umskráningu úr öðrum deildum.

¹Breytt með 1. gr. rgl. nr. [629/2013](#).

²Breytt með 4. gr. rgl. nr. [194/2025](#).

³Breytt með 17. gr. rgl. nr. [713/2025](#)

91. gr. Námsframvinda, próf, lágmarkseinkunnir og hámarksnámstími

[...]¹

Til að standast próf í BA-námi í lögfræði verður stúdent að hljóta minnst einkunnina 6,0 í öllum námsgreinum hverri um sig. Lokaeinkunn til [BA-gráðu]⁴ í lögfræði skal reiknuð sem vegið meðaltal einkunna úr einstökum námsgreinum.

Próf skulu vera skrifleg nema deild ákveði annað.]¹

Stúdent er ekki heimilt að gangast oftari en fjórum sinnum undir sama prófi í námsgreinum í BA-námi. Falli stúdent fjórum sinnum á prófi í sömu námsgrein í BA-námi, er hann fallinn úr Lagadeild.

Lagadeild getur heimilað að laganám sem stundað hefur verið við aðra háskóla verði metið sem hluti af BA-námi.

Stúdent skal hafa lokið [BA-gráðu]⁴ í lögfræði eigi síðar en á því almanaksári þegar fimm ár eru liðin frá innritun hans í BA-nám við Lagadeild. Lagadeild getur veitt undanþágu frá þessum ákvæðum um tímamörk ef veikindi eða aðrar vítaleysisástæður koma til.

Stúdent skal hafa lokið [BA-gráðu]⁴ í lögfræði frá Lagadeild Háskóla Íslands áður en hann hefur framhaldsnám í lögfræði til [meistaragráðu]⁴. Lagadeild getur heimilað að stúdent, sem lokið hefur sambærilegu prófi frá öðrum háskóla, hefji framhaldsnám við deildina til [meistaragráðu]⁴.

Fyrir hver áramót ákveður Lagadeild þær námsgreinar í framhaldsnámi sem boðnar verða til kennslu á næsta háskólaári, að minnsta kosti 10 námsgreinar á hvoru misseri.

Í framhaldsnámi skal stúdent velja sér efnissvið til ritgerðar eða annars lokaverkefnis.

[...]² Stúdent skal velja einn af kennurum deildarinnar sem umsjónarkennara í lokaverkefni og skal valið háð samþykki kennarans og Lagadeildar. Stúdent skal þreyta próf úr efni ritgerðar eða lokaverkefnis og skal tekið tillit til frammistöðu hans þegar gefin er einkunn fyrir ritgerðina eða verkefnið. Í stað prófs má gefa stúdent kost á að gera grein fyrir efni ritgerðar eða verkefnis opinberlega. Stúdent getur ekki lokið ritgerð eða lokaverkefni nema hann hafi áður staðist próf í námsgreinum sem vega að minnsta kosti 70 einingar alls. Lagadeild setur reglur um kröfur sem gerðar skulu til ritgerðar og lokaverkefnis, einingafjölda þeirra og hlutverk umsjónarkennara.

Lagadeild ákveður fyrirkomulag prófa í framhaldsnámi, þ. á m. getur deildin ákveðið að próf í einstökum námsgreinum verði haldin á miðju kennslutímabili. Heimilt er að ákveða að ritgerðir eða önnur námsvinna komi í stað prófs í námsgrein, að hluta eða öllu leyti. Stúdent má ekki gangast oftari en tvisvar sinnum undir sama prófi í námsgreinum í framhaldsnámi. Um sjúkra- og upptökupróf fer að öðru leyti eftir ákvæðum 56. gr. þessara reglna.

Til að standast próf í framhaldsnámi í lögfræði verður stúdent að hljóta minnst einkunnina 6,0 í öllum námsgreinum, hverri um sig, og einnig fyrir meistararitgerð (eða annað lokaverkefni). [Einkunn í hverri námsgrein reiknast sem vegið meðaltal verkefna og prófa í viðkomandi námsgrein, en stúdent skal þó ná einkunninni 6,0 í lokaprófi

námsgreinarinnar.]³ Lokaeinkunn til [meistaragráðu]⁴ í lögfræði skal reiknuð sem vegið meðaltal einkunna úr einstökum námsgreinum í framhaldsnámi.

Lagadeild getur heimilað að nám við aðrar háskóladeildir eða aðra háskóla verði metið sem hluti af framhaldsnámi, þó að hámarki 60 einingar alls. Áskilið er, að nám við aðrar háskóladeildir eða háskóla hafi, að mati Lagadeildar, slík tengsl við lögfræði, að eðlilegt þyki að meta það sem hluta af laganámi. Lagadeild getur enn fremur heimilað að námsvist hjá fyrirtæki eða stofnun, sem hlotið hefur viðurkenningu Lagadeildar samkvæmt reglum sem deildin setur, verði metin sem hluti af framhaldsnámi, þó að hámarki 6 einingar alls. Þátttaka í alþjóðlegri eða norrænni málflutningskeppni getur komið að hluta eða í heild í stað námsvistar.

Stúdent skal hafa lokið [meistaragráðu]⁴ í lögfræði eigi síðar en á því almanaksári þegar fjögur ár eru liðin frá innritun hans í framhaldsnám við Lagadeild. Lagadeild getur veitt undanþágu frá þessu ákvæði um tímamörk ef veikindi eða aðrar vítaleysisástæður koma til.

Fræðasvið félagsvísinda gerir árlega, að tillögu Lagadeildar, ef þörf krefur, rökstuddar tillögur til háskólaráðs um takmörkun á fjölda stúdenta í meistara- og doktorsnámi við deildina. Ákvörðun háskólaráðs skal tilkynna fyrir upphaf þess háskólaárs, sem hún tekur til. Háskólaráð setur, að fengnum tillögum deildar, reglur um hvernig staðið skuli að inntöku stúdenta og skulu þær birtar í kennsluskrá ár hvert.

¹Breytt með 5. gr. rgl. nr. [970/2009](#).

²Breytt með 2. gr. rgl. nr. [629/2013](#).

³Breytt með 1. gr. rgl. nr. [71/2025](#).

⁴Breytt með 18. gr. rgl. nr. [713/2025](#).